

CHINESE - JAPANESE LIBRARY OF
NO LONGER PROPERTY OF
HARVARD YENCHING INSTITUTE
AT HARVARD UNIVERSITY
JUN 30 1953
HARVARD-YENCHING LIBRARY

gift

晦軒先生實紀序

道學之興必有倡之者倡之之道在於學校之興廢耳惟我東方自箕疇之教熄而學校之政遂廢羅麗以來貿貿焉蔑蔑焉專尚佛教吾道之委於草莽者千有餘年矣蓋天運否塞陸氏之學亦盛行於中國卽宋末元初也時晦軒安文成公獨慨然憂世教之晦旨歎左道之肆行作詩以嚴斥之捐私財創學宮納臧獲供學徒購孔聖及七十子遺像於燕京一體安安而尊奉之且摹朱夫子真揭于堂晨夕祇拜以寓敬慕之志士之聞風嚮化詣門而請業者動以百

哈佛燕京學堂
圖書館珍藏印

數暨夫圃隱先生繼其淵源而闡明之以啓我朝
右文之治羣賢相傳儒化丕興數百年禮樂文物燦
然備具天下咸稱以禮義之邦者繫誰之功也向無
先生則環東土數千餘里得免爲夷狄禽獸之域者
幾希矣宜乎其登配文廟血食千祀也先生順興人
在麗朝爲門下侍中海東提舉號晦軒在我中朝
朝周慎齋世鵬爲豐基郡守時得先生讀書舊址於
順興府小白山下白雲洞拓其址築創立院宇備經
史而藏之買田民而供之以爲儒林講肄之所及退
溪先生上書道伯轉聞于朝請院額上以御筆特

書紹修二字賜之猗歟盛哉昔朱夫子在南康重修
白鹿洞書院倡率諸生講磨學業一代慕效伊洛關
閩之學大明於世今慎齋尊晦軒之學慕朱子之事
建祠于藏修之地院規講儀一依白鹿故事使嶺之
士由是而向學蔚然爲鄒魯之鄉而我朝書院之
設始肇于此沛而論之何莫非先生紹絕學修廢校
之力而扁額之名亦豈偶然也哉先生之後裔立朝
顯達者亦多有名臣而世代漸遠滄桑屢變其子孫
乃懼先生事蹟之寢微哀輯實紀鳩聚財力將謀刊
行於世其世系行錄詳於碑誌建院顛末及國朝

褒崇祀典著於諸賢撰述金載於實紀中後之君子
覽此則可知先生闢異倡學之功不在於禹下也已
南原安上舍克權來請弁卷之文眇末後學辭而不
得不揆僭妄略敘其槩云爾 崇禎三癸未二月日
輔國崇祿大夫判中樞府事兼弘文館大提學藝文
館大提學 世孫師李鼎輔謹序

異端之亂吾道如莠於苗紫於朱爲世大患實關氣
數然方其熾也天必生聖賢而闢之使斯道晦而復
明在戰國天下之言不楊則墨孔子之道不著于時
也以斥二家尊孔子爲已任者惟孟子一人庸非間

世而生者歟竺教之來久矣而其盛未有如王氏之
季殆不識孔子之爲聖時則若晦軒安先生出慨然
有詩曰香燈處處皆祈佛簫管家家盡祀神獨有數
間夫子廟滿庭春草寂無人遂購畫先聖及七十子
像又嘗精構一堂奉安孔夫子真以時祇謁其於育
養青衿以廣杏壇之教者靡不用極又陸氏之學金
駕考亭至胡元則一世靡然不復知有朱子之賢先
生往來中州慣熟耳目而獨以朱子爲孔子後一人
其言曰欲學仲尼當先學晦菴嘗掛晦菴真於座右
晨夕瞻拜一如敬慕夫子夫釋陸之盛於先生之世

殆甚楊墨而乃能以斥二教尊孔朱爲已任者亦惟先生一人是又天之篤生先生以相斯文而庶幾功不在孟下矣故自勝國躋享聖廡我聖朝褒崇之典亦無不備但世之尊先生者徒見事功之大而若其所以爲事功之大者則鮮或濶知蓋以先生平日學問無文字可徵也然孟子之爲孟子以其開聖道距楊墨卽此已可知其所學是孔子之學不待盡讀七篇考遏慾存理之說知言養氣之工而後驗之也然則欲知先生之學者不必他求求之於衛孔朱排釋陸足矣使先生無濶造實得則不知孔朱所事者

何事而篤信尊敬之如是又何能卓然自拔於舉世
汙妄之中隻手辭闢首倡儒教日星於昏衢乎抑後
來諸賢踵先生而起心法相傳蔚爲儒宗者實以先
生爲權輿百世可徵亶在於是今反以區區文字之
有無爲之輕重則淺之爲知先生也彼麗史之但稱
以贍學從祀者陋矣又何足掛齒乎先生後孫克權
甫哀輯先生事蹟求余一言以弁之晚生蒙識何敢
有議於大賢道德而竊自妄論先生所以闢異尊聖
以接孟氏者實本於心學以附闡幽之義云爾 崇
禎三甲申仲春後學凝川朴聖源謹序

晦軒先生生麗季衰亂之際慨然以興學育才爲已
任學校始修儒風大振史稱文成以納館基入土田
臧獲得列祀典則其陋甚矣此安上舍克權氏事實
紀之所爲作也覽者尚恨其狀德不該遺風不多其
造詣德業無足以考徵然一齋而知全鼎察影而知
其形善觀者能之今就此書所載誦其詩跡其行而
不知其人雖多亦奚以爲蓋先生之世可謂極否矣
中國淪於左衽聖道化爲異教而國俗所尚非淫祀
則胡鬼先生以一心涵天命四氣之和以一身擔三
綱五常之重精誠所及遠近響應立朝則百僚山仰

治郡則庶民子育奉使而胡虜服義贍學而武夫知
罪其升堂設教北面而鼓篴者動以千數當是時先
生之名聞天下殆若安定之於湖學及其歿而七管
十二徒素服哀號縉紳韋布合辭以配聖廟是豈區
區土田臧獲之所能易乎謹按碑誌先生學主誠敬
研精義理克治既嚴表裏一致莊重安和人皆畏敬
嗚呼傳所謂本立而道生誠著而物動者非耶先生
之爲先生宜其在是乎及其晚年德成自號晦軒一
以朱子爲標準使我東人知尊朱而斥異以基本
朝休明之運而大賢輩出則又誰之功歟其配食聖

庶宗師百世者豈徒然哉余嘗曰讀滿庭春章之詩則知先生之憂矣誦四馬春風之句則知先生之樂矣然苟不能立伊尹之志修顏子之學則不足以知先生之全體矣不知先生則又烏足以知朱子哉余將南遊小白敬拜竹溪之遺像省識其春風顏面然後歸而證明此書庶不爲暗中摸像上舍君徵余弁卷之文姑書此以諗之 崇禎三甲申季秋下澣後學恩津宋明欽謹序

晦軒先生實紀重刊序

情易忽于近論必定于久理勢之常然也今天下傭

隸髻非無不知孔氏爲聖人者當齊宣梁惠間去孔氏纔百餘年耳一時之學不入于申商則入于楊墨其能尊孔氏者惟孟子一人而已蓋知聖之難於近如此晦軒安文成公之生去朱夫子僅四十餘歲方是時女眞蒙古交兵于中國麗氏之梯航不及於浙閩之間者百年自王宮以下家家奉浮屠氏梵唄之聲多于絃誦學士大夫號爲博極載籍者亦未嘗識朱子爲何如人也自文成公一入燕都始手鈔其書以歸又購其圖像與孔氏俱奉于座右又爲文告太學諸生使之一遵朱氏然後朱氏之學始稍稍行于

東方至今談經傳者非朱子之書不敢治雖俗衰教弛大儒不作異端邪說之說猶不敢公行而無忌嗚呼是誰之功也夫孟氏之尊孔在鄒魯之間而公之尊朱在於海東萬餘里之外孟氏之尊孔得於曾子子思傳授之餘而公之尊朱得於戎狄浮屠蔽塞之中使孟氏而見公亦豈不許以豪傑之士無所待而興者哉由文成公以後權菊齋李益齋禹文僖諸公相踵而起皆以尊朱爲事至園隱鄭文忠公而愈益大章明于世然朝廷之上猶尊浮屠氏自若以故終麗之代不及食崇儒之效而我國家受之遂享有

四百年文明之治是公之功不獨在斯文而實大有
造于我邦宜乎其廟食百世澤流昆裔貴相望于
公卿而賤猶得復其庸徭也公家舊有實紀公十九
世孫在默甫益修輯之書將鉞諡序于奭周奭周謂
公大節在史冊顯名在婦人孺子之口學術淵源又
在諸先輩敘述俱無容贅爲也顧今世去賢益遠譚
治者右功利攻業者尚新奇而衣方幅闊袖者殆不
識尊賢爲何事于斯時也而表章文成公之道亦詎
非世教之一助哉遂特書其大者以屬之云歲丙子
亥月旣生魄越五日後學豐山洪奭周謹序

晦軒先生實紀三刊序

先生嘗有二首詩其略曰滿庭春草寂無人又曰百年天下帝單于其宇宙心曾不盡沈湮至今讀之使人有慷慨者多讀其詩而不知先生之爲何如人可乎先生姓安諡文成號晦軒蓋當勝國之末應時而降焉時則越瞻中州禮樂弁髦顧我大東釋教充滿靡然之勢不翅洪水而猛獸惟先生毅然以衛聖道闢異端爲已任執德則主誠敬而精義理以至表裏一致莊重安和倡學則必以朱子爲射者之的而其言曰欲學仲尼當先學朱子事業則捐進己宅俾作

館學旣而又納臧獲以備館僕又旣而全置贍學錢以供館儒或送入燕京畫先聖賢遺像以寓羹牆之慕或走貨江南全購祭器樂器用資祠獻絃誦之地又憂左海經籍罕甚廣求六經諸子輯宋書等編以歸於是習俗次第丕變士趨稍稍得正一傳而權菊齋禹易東李稼亭李樵隱白澹菴李益齋諸賢輩出再傳而李牧隱鄭圃隱兩賢尤其秀之秀者也入本朝津筏相承大賢真儒指不勝屈先生之盛德大業已如是而塗人耳目復何加焉然而孝慈子孫之心猶慮夫世代寢遠知德或少凡係先生之蹟於諸家

書者不拘今古不嫌語複一以繼繼悉畢具略倣素王
事紀朱子實紀已例其志將以以信充足羽翼永世
此晦軒實紀所以創之於前增之於後者也新增之
編又從以續之於今日者乎館留字諸生方謀登梓問
序於輝晃晃作而辭曰晃寂目也細耳也何敢乎第
觀近日寰宇大勢不特舉目山河依舊元世界許多
封疆種種奇技淫巧反有甚於釋氏之教民用幻心
術國以載胥溺苟使先生而復起其歔歔永歎隱憂
不平不應二首詩當日之意而止矣後人之患先生
又當如何哉此之時而增刊先生事實先生腳下僉

賢之意亦不偶然油然感懷不遑以非其人終辭爰述其槩以副其囑如右云爾若夫先生之諱某字某某州人及躋聖廟享院宇歷職始終國乘野史誌狀等文已彰灼無餘不復架疊玄默敦牂陽復月下澣後學晉陽蘇輝冕謹稿

實紀者紀其實也君子有道學之實有事行之實其實也或隱而復顯或湮而追著是故爲之記者不惟不愼且詳有先後疎密之不同旣刊而重刊歷數百年不止徵之於文字稽之於史策必得其實而後已蓋亦遺裔後學慕之篤而尊之至也晦軒文成公安

先生在麗季否昏之日倡明聖賢之學而代禊邃杳
文獻散逸人或昧昧然謂先生之學何如而服食聖
廟尚鉉應之曰天下萬古道莫大於孔子學莫正於
朱子而先生題學宮詩曰香燈處處皆祈佛簫管家
家盡祀神獨有數間夫子廟滿庭春草寂無人此時
異教盛而學校廢故傷之也此非知孔子之大道者
乎其諭國子諸生曰聖人之道不過日用倫理爲子
當孝爲臣當忠禮以制家信以交朋修己必敬立事
必誠而已吾嘗於中國得見朱晦菴著述發明聖人
之道攘斥禪佛之學功足以配仲尼欲學仲尼之道

莫如先學晦菴此非知朱子之正學者乎夫文豈貴
多乎哉惟此二篇詩文得之於斷爛之中將與天壤
不敝與日月不虧矣穹廡舍桑非先生其誰考鄭麟
趾高麗史曰某建議兩府令六品以上出銀七品以
下出布爲贍學錢又以餘貲送中原畫先聖及七十
子像并購樂器祭器六經諸子史築舍掛晦菴先
生真像以致景慕遂號晦軒忠肅王朝議以從祀文
廟有謂某雖置贍學錢豈可以此從祀其門生辛葳
力斥其議竟從祀及考金世廉所撰先生碑文史臣
乃曰公之從祀以置贍學錢何其陋也按麟趾史傳

中稱述先生者甚盛其以贍學錢從祀云者乃其時
異議人之言而非麟趾言觀於有謂二字可知也麟
趾固不知學問且數於名節故論者不深究史文而
以陋徑斷之歟是記今至三刊先生道學之實事行
之實皆徵文字稽史策而得之者館學儒生及後孫
等屬序於尚鉉顧惟尚鉉先祖贊成事貞景公爲先
生女婿尚鉉於先生實外裔也謹書之簡端用寓高
山仰之思

聖上卽陳二十年癸未季秋後學資憲大夫前任吏
曹判書兼弘文館大提學知經筵成均館事世

子左賓客光山金尚鉉謹序

晦軒先生實紀四刊序

惟我文成公晦軒先生吾東初頭出理學之宗也
前乎先生有八條之教而其教始變得夷俗而已近
而又有九齋之學而其學卽經義齋治事齋也方當
禪陸懷襄天下也麗氏淫於異教爲最甚苟非先生
作於其間尊孔氏宗朱子扶一線吾道之脉於積陰
之中以剗畜腹之書契大法則何以開羣龍之經緯
而屬我泰通之世也哉今此實紀專據周文敏公所
輯竹溪誌而取先生詩文之追拾者及列朝成命

及後賢敘述諸篇以成之自元陵癸未至純祖

丙子太上癸未屢次印行而其印多用活字以此
流布有限不得家珍而戶璧也於是域內章甫庸是
病焉遂設刊役於晉之硯山來請一言舉先君之忠
以勗之噫吾先君文純公於白雲洞書院果有表章
之功其文昭載此紀中不肖無狀尤何敢著穢編端
自納忝生之科也哉第觀記之編次或有可商字畫
又多舛訛不得已略加點表以聽梳洗者取舍僭妄
之罪無所逃焉然不肖每誦先生詩有曰一鳩曉雨
草連野匹馬春風花滿城非和風景雲氣像乎有曰

獨有數間夫子廟滿庭春草寂無人非自任以斯道
之重者乎有曰最是此生無限痛百年天下帝單于
此卽春秋尊攘大義而凡我不幸種種爲弱國之臣
者聞此孰不掖腕張膽痛哭流涕也舉此三詩先生
之盛德大業不待麗史本傳斯可知也况傳一轉而
爲誌誌一轉而爲實紀乎實紀者紀其實而欲溯其
本也溯其本而欲學其道也吾知是紀之行必有感
發興起而吾道將自此復明也時屠維仲壘陽月日
後學真城李晚燾謹敘

朱子之學不明則孔子之道不尊吾東朱子之學自

先生始先生之爲東方百世儒宗觀於此的矣蓋觀
人必論其世先生之世果何世也數間春草之感百
年天下之痛惟先生一人而已則世可知矣且先生
之去朱子僅四十餘年朱子之學未及大行於天下
雖以中州之士浸淫陸禪知尊朱子者鮮矣况東表
去閩中不知其幾千萬里則東人之知有朱子者亦
幾希而先生一至燕京得見朱子書篤好而誠服之
斷然以爲發明聖人之道攘斥禪佛之學功足以配
仲尼欲學仲尼先學晦菴嗚呼此何處得來豈非所
謂不待文王而興者而天之所以篤生先生以幸東

方者耶遺文無傳畸零收拾僅若干篇而止微言緒
論無所尋逐雖若可憾然邪正之辨尊攘之義二首
詩已盡之千載之下讀者懍然不覺起敬至於諭學
一文淵淵源指門路昭示萬世法程更無餘蘊彼文
而不足以載道言而不足以爲訓雖充棟汗牛亦奚
以哉先生之文止此爲是若其事功之著於史傳者
赫赫照人耳目又何俟於實紀有無然列聖世有
褒崇儒賢世有述作與夫聖廟從享之典院廟尊
奉之蹟亦不可任其散漫而不爲之收錄此實紀之
所以作也世有增益前後凡三刊而編輯或不免失

次板本亦間有闕誤讀者病焉嶠南章甫乃欲考校釐正以營重刊而問序於不佞載主載主微矣老矣其何敢相斯文重役而第念有開必先理之常也殷羅麗夷教之餘而祖孔而宗朱用華而變夷以致我朝五百年文教之盛者孰開而孰先之也尊信表章自先生始斷不可誣也古人有言受朱子罔極之恩也吾東之人於先生亦當云然載主雖微亦竊自附於孔朱之後學者其於先生之事何敢曰吾不知也乃敢忘僭謹書之如此云屠維仲噩陽復之月後學八溪鄭載圭謹序

晦軒先生實紀目錄

卷之一

遺集

詩

題學宮

題萬里城

題甘露寺

七月自合浦赴召過京山贈李璵李兆年

侍從忠宣王如元時感吟

奏

卷之二

薦李愬李璘等

文

諭國子諸生

卷之二

附錄

世系源流

卷之三

附錄

年譜

列傳

行狀

眞像

贊詩並叙

次竹屋韻三

贊文三

加彩告由文

改墓告由文

改墓贊文

上禮判沈通源書

答豐基郡守張文輔書

上右相安珙書

答豐基郡守張文輔書

上禮判洪暹書

答豐基郡守朴承任書

與豐基郡守朴承任書

禮曹帖移

禮曹移文

卷之四

附錄

賜祭附諸賢祭文

英祖朝賜祭墓文

正祖朝賜祭廟文

太上朝賜祭墓文

今上朝賜祭墓文

祭紹修廟文

祭墓文

碑誌

墓誌

墓碣銘

神道碑銘并序

松京遺基碑

并碑閣記

順興鄉閭碑

祠院

紹修書院

開基祝文

奉安眞像跋

上周慎齋世鵬書

與牧使安瑋承旨安珖書

答周慎齋世鵬書

與安竹窓琰書

春秋享祝文

春秋享改定儀式

附跋

廟享圖

附跋

安文貞公安文敬公配享告由文

竹溪辭三章

道東曲九章

百雲洞致敬說

院規

白雲院初建議

書院記

日車之...

上方伯沈通源書附別紙

賜額紹修書院記

秋享後序

周文敏公追配告由文

書院首末叙

竹溪誌序此下四條出竹溪誌○增

與周慎齋書

答黃錦溪書

白雲洞次白鹿洞賦

卷之五

附錄

祠院

臨江書院

開基祝文

士林上本府書

士林通太學文

院長請狀

太學通諸道校院文

春秋享祝文

上樑文

重修上樑文

賜額時禮曹回啓

道東廟

上樑文

釋菜設行

朱夫子真移繪祝文

朱夫子真奉安告由文

安先生從祀告由文

春秋享祝文

寒泉祠

士林通於紳文

春秋享祝文

門人

贊述附詩

保甯錄附跋

追遠

祠宇營建時告由文

上樑文

墓祀首末叙

報本壇

卷之三 壇記

祝文

壇記

晦軒先生實紀卷之一

遺集

詩

一鳩曉雨草連野
匹馬春風花滿城

缺△青邱風雅
△周慎齋世鵬

曰氣像
如畫工

題學宮

香燈處處皆祈佛
簫管家家盡祀神
獨有數間夫子
廟滿庭春草寂無人

題萬里城

東史
撰要

粉堞縱橫萬里平
居民賴此得安生
當時若數秦

皇罪只在焚坑不在城一本秦作嬴

題甘露寺金海

一葉飛來鏡面平輝空金碧梵王城嶺頭蒼翠排嵐

影石上潺湲帶雨聲日暖庭花粧淺錦夜涼山月送

微明憂民未得湔塗炭欲向蒲團寄半生錦一作綠吳竹牖

澣曰憂民傷世之意溢於咏物之餘

七月自合浦赴召過京山星州贈李璵李兆年

夏初分鉞海邊來吟過三庚致遠臺驛使電馳傳密

旨文圍火迫選賢才星山瀑潦乘槎渡月窟仙飈養

桂催頽想奏名開慶席鳳笙檀板錦千堆

侍從忠宣王如元時感陰

麒麟公子白裘孤寶玦珊瑚劍轆轤上國觀風思李

札塗山贊玉愧扶屢傷心漠漠関河雪慣眼依依古

塞榆最是此生無限痛百年天下帝單于

王以世子
再如元先

注亦再赴故
云慣眼依依

奏

薦李曄李瑱等

麗儒
考蹟

密直副使致仕李曄典法判書李瑱俱有文學李晟
秋適崔元冲等明習經史請授經史教授都監使教
授之仕使諸生從而學習

文

諭國子諸生

權陽村近文集

聖人之道不過日用倫理為子當孝為臣當忠禮以制家信以交朋修己必敬立事必誠而已彼佛者棄親出家蔑倫悖義即一夷狄之類近因兵戈之餘學校頽壞士不知學其學者喜讀佛書崇信其杳冥空寂之旨吾甚痛之吾嘗於中國得見朱晦菴著述發明聖人之道攘斥禪佛之學功足以配仲尼欲學仲尼之道莫如先學晦菴諸生行讀新書當勉學無忽晦軒先生實紀卷之一

晦軒先生實紀卷之二

附錄

世系源流

安氏貫慶尚道順興府府一
有竹溪水故一號竹溪

源

曾祖諱子美高麗興威衛保勝別將追封神虎衛上

護軍三子永儒永麟永和

王考諱永儒宋寧宗嘉泰辛酉生追封樞密院副使

一子孚

皇考諱孚宋寧宗嘉定庚辰生高麗高宗甲辰文科

正議大夫密直副使版圖判書致仕追封太師

門下侍中三世追封一子珣即先生

先生諱珣初諱裕後避我顯陵諱復初諱字士蘊

號晦軒謚文成道德博聞曰文一子于器

流

先生之後今數十餘世而子姓繁昌不可盡錄

止于五世

子于器初諱遷字虛中號竹屋宋咸淳乙丑生忠烈

王壬午文科檢校贊成事順平君文順公勤學好問

曰文憲和二子牧慎

孫牧字益之號謙齋忠烈王庚寅生忠肅王乙卯文

科政堂文學進賢館大提學順興君文淑公勤學

好問曰文道三子元崇元衡元璘

德純

一日淑

慎鹵簿都監判官三子勲貞璟

曾孫元崇初諱靖忠宣王己酉生忠惠王辛巳文科

政堂文學藝文館大提學順城君文惠公勤學好問

曰文柔質三子瑗祖同垂

慈民曰惠

元衡初諱元龍文政堂文學門下侍中竹城君文

惠公一子勉

元璘初諱元崙文政堂文學檢校中樞府事耽津

君文烈公勤學好問曰文三子祐禮堵

勲典校寺事

貞禮賓尹二子益遇世

璟文即將二子鞮詡

玄孫瑗忠肅王壬午生恭愍王癸巳文科刑曹典書

庚午上疏諫止移都漢陽忤旨流外逮我 太

祖屢徵不起屏居別墅自靖以終謚景質由義而齊

曰景名實六子從約從禮從義從廉從信從儉

相同賜自上名忠穆王乙酉生洪武丙辰文科藝文館

副提學戊辰耦之廢也公大呼曰吾立朝十三

年未能補袞使國事至此遂死之四子金剛仁

剛義剛從剛

垂忠定王庚寅生文翰林知製誥一子彌老

勉號雙清堂文典校寺事興寧君二子魯生挺生

祐文大匡都僉議贊成事鰲城君文忠公一子顯

禮字立初恭愍朝文密直提學上將軍逮我朝屢

徵不起一子鴻起

堵初諱福文右獻納以孝旌六世七孝并蒙旌二子經乾

益贊成事

遇世號竹溪文戶判一子保海

輓典客寺令

詡揔卽一子社

五世孫從約恭愍王乙未生洪武戊辰文科八我

朝除吏議不就後贈吏判兼兩館大提學四子

直提學贈左叅贊璟府尹贈左贊成秀生負直
長理号西坡郡守端廟遜位棄官歸鄉祠享○

玖二子知歸文大司成贈左贊成知碩工曹典
書端廟遜位謫安州卒知歸子珙文吏叅琛號

竹齋文湖堂工判筆苑琮文郡守幾文典籍珙
系子處善文佐卽子珽號竹窓賢良科已卯賢

子光國判官琛三子處明府使處善出系處誠
文翰苑處明子璵號滄浪文湖堂琮二子處中

生負叅奉處和進士叅奉六世孫聖時號竹陽
文縣令璣子處經進士縣監處權生負處健直

長處順號愚齋堂文弘博已卯賢院享處經玄
孫好德壬辰舉義宦從除軍資監正子建丙子

韋二子時稷時高倡義贈佐卽時稷時高贈童
教處權來孫浚丁卯舉義守城贈工叅祠享子

克誠謀復皇明事被禍贈兵叅祠享處健曾
孫容縣監丙子倡義除縣監望通政處順子瑒

號竹岩遺逸院享二子昌國號梅潭才行薦察
訪院享善國司果昌國子璫號羔峰甲子倡義

善國子璫號清溪壬辰殉節贈左承旨命旌享
三祠璫王世孫克孝號栢岡文司諫克權號蒼

崖生負始編輯先生實紀○環子謹厚文執義
寬厚文監司敦厚贈頌議政仁厚武兵使贈兵

判謹厚子琳號杏陰文修撰珪護軍孝旌琳孫
璫號蟠松縣監壬辰亭子光宗扈駕龍轡中路

被禍命旌珪玄孫溫生負壬辰倡義錄功不受
子世考學行薦大君師傅不就子斌文獻納贈

都承旨子時相文弼善贈禮叅孫寬濟文校理
大濟文承旨兼濟文監司敦厚子璫左議政已

卯賢謚貞愍院享三子處謙賢良科學諭處誠
賢良科修撰處謹賢良科弘博并已卯賢處謙

子璐號蕉浦縣監著已卯錄仁厚三子璫贈左
贊成璫監司嗣全號西亭才行薦察訪戒二子

舜弼贈頌議政舜佐府使舜弼子瑋文兵判謚
文僖珪文左議政謚文簡舜佐玄孫光郁翊贊



子圭文承旨屋文承旨圭子重弼文工參屋子
重謙號藐菴學行薦參奉重晉號篋隱同樞重
觀號海高洗馬衛章重弼孫羽濟縣監重觀子
錫倣號雲橋以學行薦參奉不就嗣全曾孫明
善桂坊壬辰殉節○秀三子昌恭校尉昌廉監
察昌直副章昌恭曾孫懋號茅軒壬辰殉節祠
享憲號竹溪文府使壬辰倡義祠享懋子信甲
郡守復讎殉節贈判決事命旌祠享昌廉孫與
琮生負壬辰倡義殉節子憲奉事丁酉復讎舉
義從李忠武公殉節○理曾孫公信號梅潭文
校理理八世孫錫徽僉樞肅廟
癸亥卒貫鄉儒生上疏復邑

從禮監察

四子緒直長縉別侍信末生縉玄孫
處會縣監壬辰倡義殉節贈兵參

從義生負僉樞

二子求縣監遇縣監永子堯卿學
行薦掌令陞工議子珣中樞二子

仁孫府使贈刑判義孫府使壬辰殉節贈兵判
後以子貴贈左贊成仁孫子璉牧使壬辰錄勲
贈兵判子穎男嘉善丙子殉節命旌義孫
子璚號芹田文大司諫丙子斥和歸鄉

從廉都正

二子瑋縣監瑱參事

從信經歷贈兵參

一子進同敦寧六子扔署令拊承仕郎掄署令擢副正擢司

勇○據玄孫宗道號歲寒齋文監司贈吏判子世震贈左承旨世復贈左贊成順溪君世熙府

使主辰殉節世傑府使壬辰殉節世震來孫集號橡山文輔國者社子聖彬文大司諫世復子

夢尹郡守甲子策勲陞知中樞順陽府院君贈左議政子應昌號愚拙齋學行薦拜孝廟潛邸

師傅贈左尹順原君世傑子夢井縣監壬辰殉節○掄孫慮生員壬辰以健元陵參奉守義燒

死○撞七世孫如石文兵參如岳文翰林○擢子貴宗文持平○擢曾孫遇坤號鶴松齋文察

訪己卯禍作見罷五世孫應義號霽梧軒崇禎後尚志不仕玄孫處宅號桐塢茂申倡義

從儉工曹參議

一子浚司勇八世孫成好參奉壬辰倡義殉節

金剛郡守

五子敬止錄事敬慮護軍敬義敬曾蔭直長敬從縣監敬義子貴行文科典籍

號白山端廟遜位棄官南下贈大司諫院亭貴

行玄孫信孫主簿壬辰倡義贈吏議祠享五世

孫嗣將判官壬辰倡義景達主簿丙子倡義贈

吏議祠享景達孫載道遺逸祠享信孫玄孫瑩

民申倡義祠享

仁剛副司直三子友孝司果友

義剛縣監一子孝忠副正

從剛司正一子孝敏直長

彌老字元極監察八我朝拜殿中不起入山改名

民老躬耕晦跡六子承碩別提至碩參議乙貴正郎瑾兵議錫贈司諫瑋禮議

魯生號竹溪文舍人觀察使三子復初贈左贊成復志府使復言監司

復初子哲孫參判信孫翰林玄孫忠達文正郎九世孫汝止正字汝器佐郎十一世孫致宅持

平十二世孫
衡稷參議

挺生文直提學

三子甲謙少尹乙謙郡守丙謙
乙謙子汝舟直長三子矩佐郎民

參軍道府使撥施愛亂矩來孫克仁奉事克禮
僉樞克智部將克禮八世孫世龍孝碑克智

子幾號泉谷進士丁卯倡義贈承旨矩身孫
忠一號醒菴丁卯倡義信一號退隱縣監丁卯

龜駕江都民曾孫舳號鈍菴文牧使世稱湖
南三高玄孫重默號桐崖洗馬來孫邦俊號隱

峯逸參議謚文康院享道子碩孫號四
友堂孫禧判尹七世孫大壽同樞贈戶判

顯文兵判

兵判子允基文輔國贈右議政子士宗文
起號平村兵馬團鍊使端廟遜

位棄官南下贈禮判止號阜
隱文左贊成文靖公院享

鴻起文修撰

子遇號蘆溪逸縣監已卯名賢院享
子重光參軍端宗遜位辭官歸鄉

子商卿僉知子弘學行薦持平不就除縣監沂
文案訪壬辰殉節子克家號磊谷壬辰倡義逸

縣監院亭

經戶曹正郎孝旌一子從佑正郎孝旌玄孫起宗

贈吏議

乾都事孝旌二子全全三全縣令三全孫汝

保海郡守二子銀碩進士

社宗簿寺令一子義興文少尹賜紫金魚帶玄孫

僉正壬辰錄勲贈禮參玄孫鍊石號保晚堂文

郎守贈禮判子復駿號釋軒文知中樞特進者

社內賜明義錄添刊大訓

海軒先生實紀卷之二

晦軒先生實紀卷之三

附錄

年譜依朱子年譜例年下分書先生行年附以卒後褒崇諸事

宋理宗淳祐三年癸卯高麗高宗三十年

某月日先生生于興州城南坪里村鶴橋傍第家

故宅在府城南數里許竹溪上自護軍公諱美先子

生曾居焉鄉閭壇記

白頭雄峙南支騰鶩高聳天表曰太白夏延
衰而南藏蓄不洩曰小白支股回環洞壑幽
澗清流又映帶其前曰竹溪其扶輿淑氣固

當鍾而為大人君子扶運興化以壽斯道於

不朽我先生實稟異氣生于是地成世昌白雲洞廟記

世傳先生考太師公諱幼時一術士愛其英

秀指智藏山一麓曰葬此必生大人世貴遂

葬其考樞密公諱永儒至是先生生而倡明斯

學大闡儒風一洗三韓之陋蔚為東方道學

之祖子孫蕃衍貴顯久而不衰云壇記。家乘。

四年甲辰先生二歲

五年乙巳先生三歲

六年丙午先生四歲

七年丁未先生五歲

八年戊申先生六歲

九年己酉先生七歲

十年庚戌先生八歲

十一年辛亥先生九歲

十二年壬子先生十歲

先生自幼時端重不妄言笑

實祐元年癸丑先生十一歲

二年甲寅先生十二歲

三年乙卯先生十三歲

四年丙辰

先生十四歲

五年丁巳

先生十五歲

舊第下有小潭先生幼時嘗習書洗硯號洗硯池

城北有宿水寺先生少日亦嘗往來讀書焉壇記

六年戊午

先生十六歲

開慶元年己未

先生十七歲

景定元年庚申

元宗元年先生十八歲

九月登魏文卿榜及第

家乘

先生少好學文章夙就清勁可觀列傳考官參知

政事李藏用同知樞密柳玟取進士賜乙科魏

文卿等三人丙科七人同進士二十一人明經

二人及第

麗史選舉誌

璫有藻鑑三典禮圍取人先

器識而後文藝所得皆知名士李尊庇安晉李

混是也見先生文歎賞曰他日必成大儒出柳璫傳

樂翁碑說

補校書郎遷直翰林院列傳

二年辛酉

先生十九歲

三年壬戌

先生二十歲

四年癸亥

先生二十一歲

五年甲子

先生二十二歲

度宗咸淳元年乙丑先生二十三歲

子于器生

字虛中號竹屋諡文順○忠烈王壬午文科官至匡靖大夫檢校僉議贊成事

封順平君族姪文貞公軸撰誌崔拙翁溍撰眞像贊曰衣冠整肅狀貌端嚴律身寧儉而無華臨事

有勤而按誌先生前夫人漢南郡君夫人金氏右不迫云

司諫祿延女生一男五女男于器女知開城府事

文項判典客寺事許綏通文署錄事朴濟直史館

韓守延贊成事貞景公金士元後夫人瑞原郡君

夫人廉氏禮賓卿守藏女前後夫人聘卒年月日

并逸無考

二年丙寅先生二十四歲

三年丁卯先生二十五歲

四年戊辰先生二十六歲

五年己巳先生二十七歲

六年庚午先生二十八歲

六月遭三別抄難尋脫歸

初崔瑀脅高宗遷都于江華專擅國政以國中
多盜立別抄兵爲左右將軍又以國人之自蒙
古逃還者爲一部號神義軍是爲三別抄及王
自江華還都舊京命罷其軍軍莫知所適賊臣
裴仲孫率三別抄乘時作亂于江華立承化侯

日軒先生年譜卷三

溫劫諸宰先生陷於賊賊素慕先生名欲用之

誘且脅令曰縱安翰林者罰先生曉以逆順之

義得脫歸王義而嘉賞焉列傳

七年辛未先生二十九歲

奉使西道召還內侍院奏祛院中宿弊列傳

先生以廉謹被獎召還內院上書書逸不傳奏院中

宿弊盡祛之列傳時院僚率以狎昵相尚而先生

以禮自律院中肅然考蹟

八年壬申先生三十歲

遷監察御史列傳○按列傳無年月而後孫羽濟世乘係于是年今姑從之

九年癸酉

先生三十一歲

十年甲戌

先生三十二歲

恭帝德祐元年乙亥

忠烈王元年○先生三十三歲

拜尚州判官

列傳

時有女巫三人託神惑眾自陝州來歷行郡縣所至作人聲呼空中隱隱若喝道聞者奔走設祭莫敢後雖守令亦然及至尚先生杖而繫之巫假神言怵以禍福州人皆懼先生不為動後數日巫乞哀乃放之其妖遂絕

列傳

端宗景炎元年丙子

先生三十四歲

二年丁丑

先生三十五歲

召拜版圖司佐郎

列傳

九月征倭後將復用兵置兵馬指揮營於合浦
修造戰艦儲置糧餉調丁斂戶州郡疲困又消
息鷹坊等徵求多端民不堪其苦先生居州三
載策應撫恤民以蘇完內臣亦不敢逞欲肆虐
按廉使以政清民安褒聞遂徵為是官

列傳

帝昞祥興元年戊寅

先生三十六歲

移監察侍御史陞國子司業

列傳

前後在察司多所糾正憲綱以振倚勢不法者

憚其公直不敢肆傳列先是文安公金良鑑入宋

摸聖廟圖以來朝廷立國子監於西部太平館

因置國子司業至是先生帶是職而屢經兵燹

學校頽敗禪佛熾昌士不知學儒風不振先生

獨慨然作詩以傷之世乘上○詩見上

二年己卯先生二十七歲○是年宋亡

忠烈王六年庚辰先生三十八歲○此下以高麗紀年

七年辛巳先生二十九歲

八年壬午先生四十歲

子于器登進士第什星誌

明車先生年譜卷三

先生兩世俱以十八歲登第世所罕有云家乘

九年癸未先生四十一歲

十年甲申先生四十二歲

十一年乙酉先生四十三歲

十二年丙戌先生四十四歲

十三年丁亥先生四十五歲

十四年戊子先生四十六歲

正月己丑由右司議大夫移左副承旨通鑑

先生好儒學尤斥異端邪說歷試內外聲稱赫

然東史

四月戊寅參羣臣宴製詩以進

世家通鑑。詩逸不傳。

宮花盛開王宴羣臣于香閣先生隨例參焉

麗史

九月癸卯以左承旨同知貢舉取尹宣佐等三十

三人

東史

中贊許珙知貢舉先生同知貢舉

選舉誌

十五年己丑

先生四十七歲

除員外郎尋加左右司郎中復加儒學提舉

時王與元合兵討外寇置征東行省王署省事

以先生為員外郎尋加左右司郎中先生德譽

遠達元又置高麗儒學提舉司王加先生提舉

麗史

閏十月壬子從王如元通鑑列傳過萬里長城賦詩見上

十六年庚寅先生四十八歲

畱燕京手抄朱子書摹寫孔子朱子真像

時朱子書未及盛行於世先生始得見之心自

篤好知爲孔門正脈手錄其書摹寫孔朱真像

而歸自是講究朱書滋致博約之功家乘

三月丁未從王還自元拜副知密直司事通鑑

十七年辛卯先生四十九歲

十八年壬辰先生五十歲

十一月癸酉王以疾移御于先生家世乘畱十二日

移金方慶家

東史通鑑

十九年癸巳

先生五十一歲

四月癸丑參功臣號賀宴作詩以進

世乘

元賜王功臣號王設宴于大殿先生作詩以進

詩逸不傳王賜米五十石

世家

二十年甲午

先生五十二歲

四月辛卯以同知密直司事除東南道兵馬使出

鎮合浦

今昌原列傳

遊甘露寺有詩

吳漢史選詩見上

七月以知貢舉赴名

世乘

先生鎮合浦撫軍恤民州郡以寧

列傳數月朝廷

將取士名使主試家七月丁卯以大將軍劉碩

代鎮家時重選法知貢舉有二人必擇有文望

者以再三典為榮乘先生枉道適暴潦到京山

訪知州李頊及進士李兆年以詩贈之詩見

十月甲申知貢舉取尹安庇等三十三人選舉閱

漬同知選舉

十二月辛丑陞知密直司事乘世

二十一年乙未先生五十三歲

正月己巳陞密直司使乘世

二十二年丙申先生五十四歲

二月甲辰移三司左使世乘

二十三年丁酉先生五十五歲

十二月壬寅拜僉議參理世子貳保世家○按誌云遷判工曹

事僉議參理而判事非參理兼帶故不書判工曹事

築精舍於居第後奉安孔朱二夫子真列傳

先生嘗曰晦菴功足以配仲尼欲學仲尼當先

學晦菴遂精構一堂於居第後奉孔朱真像朝

夕瞻謁以寓景慕仍號晦軒列傳通鑑○按此條未詳年月而閔

拙堂聖徽松京訪古錄以爲築舍揭真當在戊戌前故姑錄于此

二十四年戊戌先生五十六歲

五月辛卯王傳位於世子忠宣王卽位拜參知機

務行東京畱守集賢殿太學士雞林府尹

世乘列傳

七月戊戌復拜僉議參理修文殿太學士監修國

史

八月前王復位先生從忠宣王如元

列傳

忠宣爲世子尚元公主久畱於元嗜利之徒分

朋樹黨離間父子丁酉世子還國收王寵姬及

宦侍殺之元詔王傳位於世子忠宣卽位未久

公主妬忠宣妃趙氏專寵訴于元元以王專擅

徵王入朝執趙妃歸使前王復位先生從忠宣

如元

世家通鑑會綱

一日元主召王急王懼丞相出曰

從臣爲首者入對丞相稱省問曰王何不近公

主先生曰閨闈之事固非外臣所知今日以此

爲問豈足於聽聞哉丞相以奏元主曰此人可

謂知大體者庸可以遠人視耶遂不復問

列傳通鑑

元仍畱忠宣不遣左右侍從多檢小交構讒間

嫌隙已成

通鑑

先生懇懇規諫

考蹟

未幾還國世子

銜之後忠宣卽位先生已歿將罪先生子竹屋

公會有赦免及傳位忠肅忠肅除竹屋公密直

副使兼大司憲上王以不悛先生之故罷之以

趙羽代之羽卽趙妃弟有寵於上王故也竹屋
公有公輔望而無內援無罪見罷識者惜之

麗史

留燕京謁文廟

學官問東國亦有聖廟耶先生曰我國文物祀
典一遵華制豈無聖廟耶仍辨論性理合於朱
子說學官等大加敬歎曰此東方朱晦菴也遂

寫真以去

考蹟

二十五年己亥

先生五十七歲

九月己亥復修國史

世家

二十六年庚子

先生五十八歲

八月陞匡靖大夫贊成事尋加壁上三韓三重天

匡

麗史百官誌正一品

都僉議中贊

門下侍中贊

修文殿太學

士提修國史致仕

列傳

時吳祁等以讒佞得幸用事與內臣石天補等

表裏糾結忌先生入相諷王加中贊令引年致

仕尋復拜贊成事

列傳

○時權幸侵占民田百姓

怨苦先生嘗議革兼并之弊以恤民先生為權

幸所沮而民望先生復相王因以用之

考先生

在相府能謀善斷同列皆順承惟謹不敢爭

列傳

時世子在元本國供給元又需索多端賦斂日

急民不聊生先生建議省冗官獎廉吏擇守宰
賑貧乏等事多所採施民得少蘇蹟考

二十七年辛丑

先生五十九歲

二月獻宅于朝移居于西部良醞洞

元學官耶律希逸差使東來請謁文廟時國子
監屢經兵火只餘數間屋禮官乃指先生宅後

精舍謂為聖廟引詣展謁

訪古錄

元使以殿宇隘

狹失泮宮制度勸王新之

世家通鑑

先生即獻宅于

朝是為新館遂移居于良醞洞

訪古錄

施俸錢納土田臧獲于國學

成倪慵齋叢話

時學校蕪廢文教墜地士大夫不知聖人之學
皆崇尚異教祈佛祀鬼汙染成俗先生獨自憂
歎旣以詩曉之毅然以聞異端明聖道興學校
育人材爲己任於是施俸錢及土田納奴婢各
百口于國學以供學徒至今成均館所使皆其
子孫也太學成典○順興府舊有先生所納田三十
頃以供太學養賢之需府廢田亦失而不收
肅廟甲子後孫錫徽倡疏請復府上特褒先
生功德而允之府旣復又用力推田而還之太

學

出順興
復邑志

二十八年壬寅

先生六十歲

二十九年癸卯

先生六十一歲

請令百官各出銀布歸養賢庫為教養之資

列傳通鑑

先生憂庠序大壞儒學不振議于兩府曰宰相

之職莫先於教育人材今養賢庫儲竭無以資

教養請令六品以上各出銀一斤七品以下出

布有差歸之養賢庫存本取殖為教養之資兩

府從之以聞王亦出內帑錢穀以助之密直高

世自以武人不肯出錢先生謂諸生曰孔子垂

憲萬世臣忠於君子孝於父弟恭於兄是誰之

教耶若曰我武人何苦出錢以養爾生徒則是

不爲孔子也而可乎世慚甚卽出錢

列傳通鑑
○按麗史

此條皆在甲辰世家
通鑑癸卯置贍學錢

送博士金文鼎于江南奉先聖及七十子像購祭
器樂器六經諸子史朱子新書以來

先生憂東方經籍不備聞江南猶存宋室禮物
又多朱子新書特送博士等于江南廣購五月

還

世家列
傳通鑑

八月餞元使

通鑑

吳祁王維韶宋璘輩訴王欲沮忠宣還國禍將

不測先生與密直金台鉉協心調護欲使王父
子如初適元使斷事官來元冲甲金元祥朴全
之等諸宰請罪祁於元使皆不聽蓋元使受祁
賂故也先生以爲祁罪當反覆陳請於王不可
訴於元使諸宰不從祁不離王側欲捕治元祥
等首相洪子藩欲圍王宮捕祁先生曰以兵圍
王宮脅君也其可乎通鑑

十二月壬申拜侍郎贊成事版圖判司事監察司

事

世家

三十年甲辰

先生六十二歲

五月置贍學錢

世家通鑑

卽百官所出銀布資教養者也至是付博士官掌其出納稱以贍學錢

考蹟

六月乙酉大成殿成奉安先聖像請以李愔李頊等爲經史教授都監使

列傳通鑑

壬寅新館成至是聖廟又成王詣學謁聖七管諸生具冠服迎謁於道獻歌謠王命密直李混作入學頌以示諸生

列傳通鑑

先生請以密直致仕

李愔典法判書李頊爲經史教授都監使又薦李晟秋適崔元冲等一經置兩教授令禁內學

館內侍三都監五庫七管十二徒諸生皆從而

學習橫經授業者動以數百計

列傳
稗說

齋舍殆不

能容皆以通經學古爲事先生每朝退入館門

諸生隨教官後分庭序立行禮升堂請學竟日

討論

考蹟云其禮一
如座主門生

諸生有不禮先進者先生

將罰之生謝罪先生戒之曰吾視諸生猶吾子

孫諸生何不體老夫意耶遂引至家飲之以酒

諸生相告曰先生待士以誠如此若不化服豈

爲人哉相戒莫敢違自是儒風大振願學之士

雲集始皆知有道學矣

列傳
家乘

作文諭諸生

上文見

按先生之生距朱子歿僅四十三年是時東人實未知中國有朱子之學先生赴元始得見其書知其為孔子正傳手錄以歸自是東人始知朱子之學門人權菊齋又刊行四書集註後三十年圍隱先生相與講明其書以啓我朝文明之運學者一以朱子為準慎齋云益齋圍隱諸公皆餘波所漸矣

先生自少時好性理之學研究義理克治既嚴表裏一致莊重安詳以誠敬為務動遵禮法人

皆畏敬

會綱云少好學人皆畏敬尤以興學養賢為己任力排異端

○教人

必先以孝悌忠信精思力踐引以至於高明正大之域階級不紊本末備具訓迪開導寬而有

制人有過輒諄諄譬曉改之乃已士以此益附

之行狀

以判密直司事都僉議中贊致仕

世家
世乘

時宋玠王維韶等謀欲廢適先生與洪子藩周

旋調護請王還前王於元王雖從之猶信聽王

宋輩元遣使來監曰奸臣執命間王父子先生

知其終不可為遂致仕未幾子藩被讒罷相明

年王如元前王逼遷于慶壽寺盡誅瑞興侯璵

及玠等其餘皆杖流於是國政盡歸於前王而

王行印而已

通鑑
考蹟

先生雖謝事家居至於興學

育才惓惓未嘗怠懷獎拔誘掖成就甚多

列傳家乘

先生喜賓客好施與有識鑑金怡白元恒未達時見之先生曰他日必皆貴顯李齊賢李異同年生俱有名先生令賦詩觀之曰齊賢必貴且壽異則不年果皆驗嘗蓄古琴一張遇士之可

教者輒令操之

列傳

三十一年乙巳

先生六十三歲

六月竹屋公以國子典酒陞密直副使兩世比年相繼典密一世豔之竹屋公是年又掌試考閱精明多取知名士時稱克繼父業云

選舉誌竹屋誌

三十二年丙午先生六十四歲

九月十二日甲申卒諡文成公道德博聞曰文安

民立政曰成列傳通鑑

王特賜葬地世乘

葬于長湍府松林縣大德山口井里子坐之原

墓誌及葬七管十二徒諸生素服祭於路列傳通鑑前

配金夫人墓附左同塋異墳世乘

王又命環封墓山為墓田世譜

忠肅王五年戊午

二月命圖形文廟致祭桑鄉

先是門人白頤正自元多取程朱性理書以還
李齊賢朴忠佐首先師受成均館又遣人江南
購經籍萬餘卷而來王之元年甲寅六月命先
生子竹屋公及門人贊成事權溥會議都監事
李頊等會成均館考閱新書且試經學溥又請
刊行朱子四書集註至是王降旨曰都僉議中
贊安珦有崇設學校之功亦於夫子廟庭圖形

致祭桑鄉興州守崔琳摹一本安于鄉校

本朝世

祖丁丑府廢移奉眞像于宗孫知歸家
壬寅還安于書院元人所寫眞三傳而爲累本

安于紹修鳳岑兩院谷城道東祠龍仁直洞順
興大龍山春川佳山載寧松隅洞燕岐合江開

城寒泉
等處

六年己未

六月從祀文廟

上自朝紳下至韋布以先生倡道興學校養人

材合辭請從祀聖廟或謂某雖建議置贍學錢

有養育人材之功豈可以此從祀門人總郎辛

藏言某倡明正道排斥異教興學校作人才國

家初有之功也宜從祀忠肅從之位在東廡第

二大典通編開城府及諸道界首官外州郡學
暨祭兩廡諸位縣學並暨殿上十位惟周程

朱及群弘儒崔文昌安文成鄭文忠
本朝十二賢州府郡縣皆祀之

恭愍王十六年丁未

鄭夢周金九容朴尚衷朴宜中李崇仁等皆以
他官兼太學夏定講學規式時請祭酒禹倬贊
成田祖生皆以道學文行賜諡又請安珦文集

刊定事

儒史
節略

皇明建文四年壬午

我朝太宗
大主二年

八月 上親幸聖廟釋奠禮

命後孫永勿屬賤

役嫡孫世世錄用

教曰文成公安珦興學設教百王可範報功之
典當及苗裔其子孫雖孽永勿屬賤役嫡孫世

世蠲復錄用東西班

時各司婢子選入宮館婢二人亦與焉 上仍命
出還

上曰古人施納予不能然而反奪之耶因教
曰先賢爲先聖施納而選入宮中大違先賢本
意出還元籍自今以後未勿選入館婢

孝宗弘治五年壬子

成宗大王
二十三年

命修墳墓禁樵牧

廷臣洪貴達等白先生倡道興學之功 上教
曰文成公安珦墓山特爲修改且禁樵牧於是

封墓山麓爲墓田又置守塚軍三十名永蠲丁役

世宗嘉靖二十一年壬寅

中宗大王三十七年

建書院于順興廢府白雲洞

周慎齋世鵬素慕先生及守豐基先訪先生故居感慕不已遂就竹溪上宿水寺舊墟創立書院卽先生少日讀書處也

二十二年癸卯

中宗大王三十八年

八月奉安眞像于書院

我東書院始創於此晦齋李先生彥迪時爲方

伯以助鹽藿之費

二十三年甲辰

仁宗大
王元年

以先生族孫文貞公軸文敬公輔配

二十八年己酉

明宗大
王四年

秋 賜紹修書院額仍 賜經籍

是年退溪李先生滉繼守豐基上書觀察使沈

通源請依宋白鹿洞故事聞于 朝賜扁額書

籍以昭 聖朝崇德報功闡教育士之化通源

以其書上 聞上命議大臣大臣皆請施行

上允之○禮判尹漑請 命大提學申光漢名

之光漢請名以紹修上手書紹修書院四字

以下仍命光漢作記令藝館刊頒又賜經

籍馳驛傳之并賜田民按太學誌明廟九年甲寅命建園隱

鄭先生書院下特教曰鄭夢周道德節義不讓安裕即其生長之地州建書院扁額書冊奴

婢田結一依紹修書院例頒降

毅宗崇禎六年癸酉仁祖大王十一年

以周慎齋世鵬追配

九年丙子仁祖大王十四年

冬墓誌成

後孫順原君應昌撰文見四卷

十二年己卯仁祖大王十七年

冬神道碑成

大司成知製教東溟金世濂撰

文見四卷

舊有表歲久漫滅後孫應昌改立埋舊石於壙

南畿伯李公行遠行文列邑出牛運石給軍董

役且助奠需監司閔聖徽畱守金南重列邑宰

金霽黃床李應著等數十人聞風相役館學儒

生沈棍趙時馨金佑明亦通諭傍近鄉學俾助

其役先是墓下置田十結官給復又建齋舍以緇徒守之卽寶位寺也壬辰亂後皆廢至

是重建齋寺官又遵舊典給守塚軍致牲粢後孫應昌定以每歲十月朔日行祀改量田錄案

置以

十六年癸未

仁祖大王二十一年

建書院于長湍臨津上鳳岑山下

肅廟甲戌賜額臨江

先是畿儒白惟恆等與館儒金悌男崔起南等
議先生首倡絕學衛聖闢異明人權菊齋白彝
齋講授程朱書印行朱子集註宜共祀于松京
倡率畿甸章甫將營立書院會外寇至而止至
是長湍儒生李裕身與前縣監許暲等建書院
于鳳岑山下館學儒生李抗李廷夔李萬雄趙
相朴李慶億發文列邑校院金北渚塗沈南坡

悅金潛谷墳申東陽翊聖李澤堂植徐達城景
肅李白洲明漢洪白石茂績俞杞平伯曾李松
郊蔡洪無何柱元金滄洲益熙諸公皆協力助
之以安謹齋軸李牧隱檣韓柳巷脩金慕齋安
國忠齋正國金自菴綵配
各行狀成

東陽尉申翊聖撰

文見下

孝宗大王二年辛卯

崇禎年號止於甲申故以我朝紀年

松京遺基碑成

鶴沙金應祖撰
詹安許穆撰

文見四卷

六年乙未

春順興鄉閭碑成

大司成黃采撰承旨鄭斗卿撰

文見四卷

肅宗大王三年丁巳

冬谷城道東廟成

士林與本孫琥倡論立祠移奉應昌家所安眞
像宋文敬公煥箕書額曰道東廟後壬寅奇寢
郎宇萬與道內章甫追體精舍故事奉朱子眞
以先生配春秋仲月中丁行釋菜禮讀約設講

十二年丙寅

撤藏紹修書院影幀以位版奉安

二十年甲戌

賜臨江書院額

從時相之 啓請也

英宗大王十六年庚申

秋 上幸松京特遣禮官致祭于墓

文見四卷

三十九年癸未

道東本實紀成

後孫生員克權輯遺什事實世系碑誌諸賢記

述勝國諸史成一編鋟布藏板于廟

先生實紀始創于是

四十一年乙酉

命立嗣孫追造祠版以奉祀

建祠于桃洞

十一世宗孫判官光國兄弟俱無后因值壬辰
丙子之兵燹未遑立嗣至是自上特命以光
國高祖左贊貝成知歸第四子郡守琮九世孫昌
祿以奉祀事

正宗大王五年乙丑

建書院于松都寒泉洞

松京龍山下有泉曰寒泉其傍有讀書洞卽先
生門人權菊齋及其孫婿韓柳巷講讀之所也

去先生故居甚近而收隱遺址亦在一洞久為鄉人之所指點興想至是京外士論俱發依先生築舍掛朱子真故事立祠於寒泉洞奉朱子位版以先生及菊齋牧隱柳巷配立祠時開城士林通文及

兩丁祝文見五卷

上幸華城謁聖廟親製祭文特告安文成公文見四卷

純祖大王十六年丙子

年譜成

後孫正郎在默菟輯年譜重刊實紀

憲宗大王三年丁酉

春松京遺墓碑閣成

畱守李彥淳記

文見四卷

太上九年壬申

秋 上幸松京遣禮官致祭于墓

文見四卷

二十年癸未

館學本實紀成

秋館儒朴兢壽姜永典申錫九俞致晟等通諭
列邑重刊分布校院後孫監役明烈董刊役

今上三年己酉

閏二月二十七日遣地方官致祭于墓

文見四卷

正月二十八日酉幸時上特教曰尊聖學振
儒風至今彬彬繁誰之功蹕路遙望堂斧有儼
文成公安裕墓遣地方官致祭

硯山本實紀成

春士林與本孫合議重刊藏板于晉州硯山

壬子九月墓碣改建

舊碣歲久剝泐難徵後孫秉鎔與京鄉諸族合
議修新堂封改豎屏床碣石寢郎宋炳華撰碣

銘文見
四卷

癸丑四月松京遺基碑閣重建

碑閣年久傾圯又以鐵路附近日警官尊慕先生爲之退避路站圖自修改於是嗣孫鍾永與諸族合力修建

甲寅九月道統祠成

域內章甫追體先生精舍故事奉先聖像配以朱子從祀以先生春秋季月中丁行舍菜講論闕里衍聖公孔令貽手書祠額

乙卯秋道統祠別本年譜成

士林協議合刊孔子編年朱子年譜先生年譜三書徵序於衍聖公印布于域內及闕里藏板

光明閣先生年譜原本頗有疎脫故參之原本

及實紀釐爲別本

并實紀板藏之

丁巳七月神道碑重建

碑在墓庭歲久殘泐域內士林與本孫合議更

豎豐珉於墓洞衍聖公撰銘

文見卷四

辛酉春道統本實紀重刊

實紀凡四刊而尚有校讎之未精又有事實之

增刪士林庸是協議更以鉅梓前成均教授李

商永撰跋

麗史列傳

鄭麟趾

安珣初名裕興州人父孚本州吏業醫出身官至密
直副使致仕珣少好學元宗初登第補校書郎遷直
翰林院屬內侍三別抄之亂珣陷賊賊素聞名將用
之誘且脅令曰縱安翰林者罰珣以計得脫王義之
嘉賞十二年奉使西道以廉謹稱名還內侍院書奏
院中宿弊祛之尋遷監察御史忠烈王元年出爲尚
州判官時有女巫三人奉妖神惑衆自陝州歷行郡
縣所至作人聲呼空中隱隱若喝道聞者奔走設祭
莫敢後雖守令亦然巫至尚珣杖而械之巫託神言
休以禍福尚人皆懼珣不爲動後數日巫乞哀乃放

其妖遂絕嘗至安東令吏洗足吏曰吾屬邑吏汝何厚我耶謀羣吏將詰之有老吏視珣狀貌出語曰吾閱人多此公後必貴顯勿易視居三年廉使褒其政清遂徵爲版圖佐郎俄遷殿中侍御史陞國子司業由左司議拜左副承旨以副知密直司事出鎮合浦撫軍恤民州縣以寧屢遷僉議參理忠宣卽位拜參知機務行東京畱後集賢殿太學士雞林府尹復爲參理及忠烈復位忠宣如元珣從行一日元主召王急王懼丞相出曰從臣爲首者入對珣入丞相傳旨曰汝王何不近公主乎珣曰閨闈之間非外臣所知

今日以是爲問豈足於聽聞丞相以奏主曰此人可
謂知大體者庸可以遠人視之耶不復問二十六年
拜贊成事用事者忌之遂諷王加中贊令引年致仕
尋復爲贊成事二十九年珣憂學校日衰建議兩府
曰宰相之職莫先於教育人材今養賢庫殫竭無以
養士請令六品以上各出銀一斤七品以下出布有
差歸之庫存本取息爲贍學錢兩府從之以聞于朝
王亦出內庫錢穀以助之密直高世自以武人不肯
出錢珣謂諸生曰夫子之道垂憲萬世臣忠於君子
孝於父弟恭於兄是誰之教耶若曰我武人何苦出

錢以養爾生徒則是無孔子也而可乎世聞之慚甚
卽出錢某又以餘貲付博士金文鼎等送中原畫先
聖及七十子像金購祭器樂器六經諸子史以來且
薦密直副使致仕李懌典法判書李瑱爲經史教授
都監使於是禁內學館內侍三都監五庫願學之士
及七管十二徒諸生橫經受業者動以數百計有諸
生不禮先進珣怒將罰生謝罪珣戒曰吾視諸生猶
吾子孫諸生何不體老夫意因引至家置酒諸生相
謂曰公之待我以誠如此若不化服我則匪人三十
二年丙午九月復以僉議中贊致仕卒年六十四諡

文成及葬七管十二徒諸士素服祭於路珣莊重安
詳人皆畏敬在相府能謀善斷同列順承惟謹不敢
爭常以興學養賢爲已任雖謝事家居未嘗忘于懷
喜賓客好施與文章清勁可觀且有鑑識金怡白元
恆未達時珣見之曰他日必皆貴顯又李齊賢李異
同年生俱有名某召令賦詩曰齊賢必貴且壽異則
不年矣果皆驗晚年常掛晦菴先生眞像以致景慕
遂號晦軒蓄儒琴一張每遇士之可教者勸之忠肅
六年己未議以從祀文廟有謂某雖建議贍學錢
豈可以此從祀其門生辛歲力斥其議竟從祀于

器忠烈朝登第屢遷國子典酒右承旨陞密直副使
忠宣以珣扈從不久而還銜之將罪于器會赦免忠
肅卽位除密直副使兼大司憲無何罷以元尹趙珣
代之珣方爲忠宣王所寵而于器有公望無內援識
者惜之嘗出鎮合浦以廉幹稱十六年以檢校贊成
事卒遺命薄葬子牧登第忠肅時屢遷密直副使恭
愍王時封順興君平諡文淑

行狀

順興安氏遠有代序至高麗晦軒先生以儒術大鳴
於世推爲東方理學之祖配食孔廡專祀鄉邦其裔

孫應昌譜其世而收其旌以先生之功之德可以亢
宗壽後爰撫其遺事而冠其籍屬筆於翊聖辭不獲
則遂撫家牒參以國乘芻采諸家之說書其大者竊
取述而不作之義俾後世考信焉謹按先生諱珣初
名裕避本朝顯陵御諱復以裕行賢科釋褐事元
宗補校書郎遷直翰林院陷于三別抄之亂以計得
脫王嘉獎之自是歷揚中外奉使西方尋轉監察御
史俱以廉直稱忠烈元年出守尚州捕治妖巫之挾
神惑衆者一方稱之自密直司使出鎮合浦軍民安
之忠宣卽位拜參知機務集賢殿學士尹維林及忠

烈復位從忠宣入元一日元主令丞相傳旨汝王何不近公主先生曰閨闈之內非外臣所知亦非所宜問主曰此人知大體者庸可以遠人視之耶以贊成事入相府謂宰相之職莫先於教育人材今養賢庫儲殫竭無以廩士宜令大小官僚各輸銀幣有差子母取殖以贍學錢兩府以聞王出內帑錢穀以助之密直高世自以武弁不肯捐錢先生喻以教條世竟感悟納錢又以餘貲付博士金文鼎等購先聖若七十子遺像并購祭器樂器六經子史于中國且薦密直副使李愔典法判書李瑱爲經史教授都監使於

是願學之士雲集蔚有菁莪之化其後益齋園隱之
學皆源於此云先生爲人莊重安詳動遵禮法以興
學養士爲己任嘗憂學校政衰慨然有詩曰香燈處
處皆祈佛簫管家家盡祀神獨有數間夫子廟滿庭
春草寂無人納其土田臧獲供給學舍其徒繁衍泮
中至今賴之其爲教必以孝悌忠信精思力踐以至
高明正大之域階級不紊本末備具訓迪後生寬而
有制人有過輒諄諄譬曉改之乃已士以此益附之
其在相府能謀善斷且有鑑識獎拔尤多文章清勁
可觀不以是自名焉晚年常掛晦菴眞晦軒之號所

以寓慕也蓄古琴一張遇士之可教者輒令操之以
都僉議中贊致仕忠烈王三十二年丙午九月十二
日易簣春秋六十四謚文成道德博聞曰文安民立
政曰成及葬七管十二徒諸生皆服素王命寫真置
文廟中忠肅王六年己未從祀東廡入本朝太宗
大王下教曰安某子孫永勿屬軍役以表乃祖之功
周慎齋世鵬守豐基卽先生講學之地創書院退溪
先生增定學式請賜額紹修命大提學申光漢
爲記并賜田民以優之噫吾東方被箕疇父師之
教號稱小華而箕氏德衰逆滿阻命三國鬪爭區域

自別羅麗之際竺教大行雖有豪傑之士胥淪於異
端晦旨否塞殆數千年矣先生生於衰季能尋墜緒
一洗舊染其推爲東方理學之祖者非溢辭也易世
之後褒典益加枝庶永賴可見 列聖右文之至意
於戲盛哉其世系履歷有碑有譜茲不贅焉歲在癸
未蜡日綏祿大夫東陽尉平山申翊聖謹記

眞像

贊詩 并叙

子于器 竹屋

忠肅王五年戊午二月日降宥旨其目云都僉議中
贊修文殿太學士安珣有崇設學校之功亦於夫子

廟庭圖形致祭桑鄉興州守散郎崔琳依其目摹寫
一軀將安之于鄉校時嗣子于器適承貶鎮邊崔君
送以示之於是焚香拜手乃爲之贊曰

先君當日振儒風上命圖形文廟中一幅丹青照桑
梓四時遵豆答膚功

次竹屋韻

崔文度

明道闢邪變陋風斐然吾黨化陶中東方從此興儒
學配祀宣尼報偉功

李景奭

一生誠敬有餘風賢聖同歸繪畫中省取當年能衛

道至今扶植是誰功

洪瑞鳳

鶴谷

沿洄洙泗溯遺風留著光儀繪素中要識百年尊廟貌生平衛道有全功

贊文

金尚憲

清陰

恭惟先生稟山川之清淑傳家世之德義當麗政蔑教之日倡衛道興學之議率勵頽俗振揚儒風庠序煥然黉紳改容當此之時有以擢藻修文贊謨猷者鳴弓撫劍鎮疆圉者鼓吻抵掌解紛亂者犯顏批鱗職拾補者是皆一時之事豈若先生斯文百世之功

也哉升之聖庶報禮攸崇典刑杳往丹青在堂我辭
有述厥聲隆隆

李景奭

端拱正立者公之貌慕聖希賢者公之心貌可以繪
事傳心可以繪事尋仰瞻公貌足想和氣之融欲識
公心盍觀吾道之崇斯亦不足以盡識且求之乎居
敬之功惟闇然而日章振千古之頽風

十五世孫重觀

穆爾靖靜之衷睟然軒雅之容謨之敷也足以經國
道之韞也足以裊躬饒佛法鬼則矯九夷浸淫之俗

尊孔慕朱則闡太師作成之風其知者推為東邦道
學之首不知者方諸羅代辭崔之蹤母論其知與不
知試觀屢百年來儒教之興天敘之明是誰為之功
也歟

加彩告由文

李滉退溪

遺像糜鼓德容失全圖新功始虔告斯先

改摹告由文

黃俊良錦溪

寓慕丹青歲久寢亾更新厥像斯道之光英魂返鄉
玉色在堂示我儀形文教流長

改摹贊文

申翊聖全樂

畫像古也有勲烈則圖之殿角有惠澤則圖之鄉
邦自漢唐已然易世則隨以湮沒獨晦軒安先生
遺像在麗朝配享孔廡入我朝藏于書院以其
綃本繪絲黹昧斷爛宗伯稟旨使國工摹畫馬先
生名迹不繫於遺像之存不存而摹改於數百年
之後者可見褒尊之典易世而愈隆蓋勲烈惠澤
止於一時而衛道興學之功在百世也嘗讀六先
生畫像贊懷懷起敬有道有文厥有徵矣贊曰
以一幅殘縑署之曰晦軒先生之真莫不起敬而曰
此有道之人瞻拜希慕如親炙朕蓋其有功於斯文

如其仁如其仁

上禮判沈通源書

張文輔

文輔到官之初得謁文成公之廟就審影幀則爲因
歲久不但畫綵熹微至於綃幅破碎飛落失今不修
則恐無以髣髴形容以此深用憂慮今者指送有司
安駒仰陳情由兼使買綃而來如得精工妙手使於
春和永晝之時得就靜案明牕摹新改粧則庶使後
人觀瞻廟貌想見前人於千載之上豈非大有所關
乎但以賤遠不敢輕爲處置若欲申報監司冀得啓
達天聽則恐爲妄議之誚如使有司呈告禮部則

慮有慕越之失悶默商量者已閱數月伏乞俯採情
懇量宜指教何如金惟令監謹頓首以聞 嘉靖三

十七年戊午七月十四日

答豐基郡守張文輔書

沈通源

院長之來伏審書辭懇惻深感深感文成公吾東方
理學之祖滿朝卿相非其子孫者幾希矣百載之下
歆慕而景仰者遺像也若至飄落而失真豈徒爲子
孫之恨抑亦盛代之欠事也適一才畫員李不害以
集慶殿改彩在慶州能畫能粧真難得之才也自禮
曹移文慶州使之移去又爲私請也須與院長同議

卑辭厚幣殷懃請來可以盡心爲之也聞將到安京
金惟下照謹白戊至初六日

上右相安珰書

沈通源

豐基郡守張文輔書簡院長安駒持來開見則書辭
云文成公畫像年久破落不出數年將至失真不可
不修改令院長備絹改繪改糝云源之意若改之絹
不如古則莫若不改之爲愈也然若將棄則又不可
不卽精改也一才畫員李不害以慶州真殿改彩事
下去爲府尹所挽留在不徒才長寫真糝續亦其長
技也此人適在近地豈非天乎南方候燠若入溫垓

則雖三冬可以起役今日備邊司告于左貳相曰李
不害欲修文成公影幀大監爲圖畫司提調可以行
下也貳相答曰今世眼明能寫者無如不害況安東
府使懇借不害卽移去事行下矣安東尤僂近也雖
尚在慶州豈遠哉吾何敢不許云安駒空速備綃糲
還去

答豐基郡守張文輔書

安珖

承審平安仰賀開示先影幀改成事詳悉備至仰感
千萬禮判亦承示至誠措置似乎可成仰感仰感因
審措置書院事款至無餘不勝仰感仰感惟下照謹

拜謝 嘉靖三十七年至月十一日右議政安珪

上禮判洪暹書

朴承任

謹伏問神相台候如何小人伏蒙令賜備員殘郡艱
保羸喘伏惟令監就達惶恐郡地紹修書院厥初建
立時奉安安文成公畫像春秋祠祭以爲學子瞻仰
之地爲因摸畫年久綃縷碎缺顏面以下裂成橫畫
殆無完處前倅謀欲改畫賀備綃彩又書請摸工于
京荷諸相公盡心指揮事幾得成而適畫手病滯遠
境終被國事催回未遑而去今經靈暄雖奉護惟謹
而缺裂日增若過一臘必至無可髣髴摹亦失真誠

非細慮頃日監司巡歷謁祠親審極以爲憂卽命申報帖移實欲該曹轉啓施行竊念泛然文報非但未安斯文莫重之舉反若輕緩故委諸院中有司使之罄訴曲折其題名妙手刻期發送特煩閣下一開口之勞數歲經營而未獲者指日可成不勝欣幸之至竊惟文成公道德之懿在當時已極推仰故前朝亦以王命寫真藏在宗家此奉安院中者又其傳摹之本今改畫之舉雖關稟朝廷事體亦恐不至大妨伏惟令恕鑑仰恃眷厚冒昧煩控惶恐惶恐謹拜上狀豐基守朴承任

答豐基郡守朴承任書

洪暹

文成公畫像改畫實是斯文僉議之所屬敢不力副
詳審院長之報仰認珍重忙不一已未九月初七
日禮曹判書洪暹

與曲臺郡守朴承任書

安珰

先人影像幾至銷蝕專賴力措禮判曲盡周旋得使
畫手乘駟以進累年共慮之事一朝可成感極何言
且迷劣院屬人輩生理之際必多煩瀆告達想必有
生澁可厭之理而每蒙寬教厚恤聞之不勝感激且
聞儒生等共感於心咸欲進寓慕仰風聲自就長進

一動靜之間便能養育人材以爲國家之用孰不感激乎禮判一品大相爲斯文宗匠而待院長款接如舊識其致感於左右可知亦爲喜慰無已且達文成公王考樞密墳塋今始修整新構小菴名曰永慕後日必爲官人所侵欲追文成之志屬諸書院以冀永久其間閣器物命錄於書院謄錄官爲署印以爲後考是仰伏惟尊照謹拜謝 嘉靖三十八年九月初十日化下左議政玆頓

禮曹帖移

禮曹移送事以集慶殿改彩事下去爲有臥乎畫員

李不害乙良豐基白雲洞賜額紹修書院安文成公
畫像改畫次以到關卽時同院以移送向事合行移
關請照驗施行須至關者右關慶州府 嘉靖三十
七年十一月初五日關判書參判參議著署

禮曹移文

啓目節到付慶尚道觀察使帖連豐基郡守朴承任
牒呈內節該郡地紹修書院良中前朝文成公安裕
畫像別造祠廟掛安致敬爲如手今幾二百餘年綃
簇裂破日至失真改畫成次以雜物已備爲有在果
人物善畫圖畫署畫員李不害下送爲良在等趁時

改畫母令失真爲良結牒呈及關是白有亦安裕畫
像非歷代共尊先聖先師之比是白去等啓請畫師
下送改畫事體未安爲白在果向前安裕段明於儒
術爲一世所宗分叱不喻有功學校至今學宮世賴
其助乙仍于別立書院安靈揭虔聚養學徒製記
賜額因給書籍致敬之具不一而足爲白去乙使其
遺像泯滅無傳爲白在如中其在後學欲想面貌敬
對尊禮之意似爲欠闕爲白置本郡題名李不害亦
因私事清洪州瑞山等處下去未還是如爲白昆移
文清洪道觀察使令所在官給馬豐基郡指送何如

嘉靖三十八年己未九月初四日左承旨李彥忠次
知啓依 允教事是去有等以初亦令所在官給馬
爲良結受 教本意是在果萬一解見不得所在官
叱分刷馬出給慶尚道金以不給驛馬爲在如中不
無難進之意是昆各道一路金只給馬爲只爲行移
向事

晦軒先生實紀卷之三

